



partii naleraq

UKA 2017/007-01

26-09-2017

2018-imut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

2018-imut aningaasanut inatsisissatut siunnersuut Partii Naleraq sinnerlugu imannak oqaaseqarfigissuarput.

Aallaqqaasiullugu Partii Naleqqamiit erseqqissaatigissuarput; Partii Naleqqami naalakkersuinikkut anguniakkatta pingaartut ilagimmassuk, inuit pissakinnerusut sanngiinnerusut akunnattumillu isertitaqartartut ulluinnarni atugaasa oqilisarneqarnisaat, taakkua nukittorsarneqarnisaat qaffassarneqarnissaallu inuiaqatigiinni pitsaanerusunik atugassaqalernisaat anguniarlugu suleqataaffigissallugit.

Tassami paatsuungassaangitsumik aamma nunatsinni naatsorsueqqissaartarfiup nalunaarsugai naapertorlugit inuit pissakinnerit ukiumut 250.000 kr-it ataallugit isertitaqartartut 75 % missaani amerlassuseqartut.

Taamaamat isumaqarpugut nunatta namminersulivinnissaanut aamma inuit qulaani eqqartukkavut sutigut tamatigut akuutinneqarnerulernisaat, kivitseqatigiilluta qaammarsarneqarnisaat, nukittorsarneqarnisaat, ilinniartitaanikkullu qaffassarneqarnisaat tamaviaaruttariaqaripput.

Aamma isumaqarpugut innuttaasut naalakkersuinermik suliatsinnik radio-kut tv-kut malinnaatinneqarnisaat tamaviaarullugu piviusunnngortinneqarnissaa sulissutigisariaqaripput, tassami KNR-ip ingerlanneqarneranut landskarsit ukiut tamaasa 70 mio kr-it pallillugit aningaasaliissuteqartarpoq. Taamaamma KNR-ip suliassaq taanna sularisinnaanngippagu, tusagassiuuteqarnermik suliaqartut allat, soorlu Nuuk TV radio-lu neqeroortinneqarsinnaanerat periarfissinneqartariaqartut isumaqarpugut.

Taakkua saniatigut inuit tamatta ataasiakkaarluta inuiaqatigiinni akisussaassuseqarnerput tamatsinnut paasisitsiniutigiuarlugulu qaammarsaassutigisariaqarparput.

Paasititsiniaanermi imminut pilersorsinnaaneq, imminut ilaqutanillu napatitsisinnaaneq akisussaassuseqarnermullu pingaartumik meeqqanut inuusuttunullu tamakkiisumik tunngaviusumik ilinniartitaanermut atuartitaanermullu paatsuugassaangitsumik ilaatinneqartariaqarpoq.

Inuiaqatigiinni susassareqatigiinnerput, ikioqatigiissinnaaneq sutigut tamatigut akissaq pinngikkaluarlugu siuarsaaqatigiissinnaaneq ilikkarnerusariaqarparput.

Meerartatsinnut inuusuttortatsinnullu ilinniartitaanikkut suli pitsaanerusunik periarfissiisariaqarpugut. Maani nunaqavissut kikkungaluarunilluunniit aamma namminneq oqaatsivut atorlugit minnerpaamik assassornermik suliaqarfiusuni ilinniakkamik aallartitsisinnaanerit atorluarneqarnerusariaqarput.

Uagutsinnut imminut upperinerulerlitalu tatigineruleqqittariaqarpugut. Ilinniarsimasortavut atorluarnerusariaqalerpavut, nunaqavissunik pikkorissartitsinerit ilinniartitseqqiinerillu suli annerusumik aallunneqartariaqarput.

Tikisitanik isumalluuteqarnitta minnerpaaffissaaniitinneqarnissaa nalilersorluarlugulu ersarissumik politikkeqarfigisariaqalerparput.

Nunatta avataaniit pilersorneqarnerput nalilersorluartariaqalerparput, minnerunngitsumillu nunatta nammineq tunniussinnaasaanik nerisaqarnikkut atortulersuutitigullu pilersornerulernissarput anguniarlugu.

Aningaasat nunatsinni annerusumik kaaviiartinneqarnerulernissaat pimoorunnerusariaqalerparput.

Naluneqanngilaq Namminersorlutik Oqartussat suliassanut, kiffartuussinernullu assigiinngitsunut atatillugu aningaarsarparujussuarnik nunatta avataanut akiliuteqartartut. Tassani assersuutigineqarsinnaapput nunatta avataani siunnersortinut aningaasartuutit ilaatigut ukiumut 200 mio kr.it angullugit annertussuseqartartut.

Sillimmasiinernut suliffeqarfiit namminersorlutik oqartussanit pigineqartut, namminersorlutillu oqartussat sillimmasiinernut aningaasartuutaat, Namminersorlutik Oqartussat nunatta avataanut suliakkiissutigisartagaat assigiinngitsut ilarparujussuulu ilanngullugit.

Parti naleqqamiit isumaqarpugut nunatsinni aningaasat kaaviiarnerat, isertitat aningaasartuutillu nunatsinniit aniasut tamakkiinerusumik misissuiffigineqarlutillu aaqqiivigineqartariaqartut, tassami nunatta aningaasaqarnera ataatsimut isigalugu, ukiut tamarluinnaasa nunatta avammut niuernermini ilaatigut ukiut ilaanni 2 mia. Kr-it angullugit nunarput amingartooruteqartarpoq.

Isumaqarpugut nunarput aningaasatigut pitsaasumik ineriartussappat, minnerpaamik nunatta avammut niuernermini sinneqartooruteqarnissaa anguniarneqartariaqartoq suliassa qarfiillu assigiinngitsut nunatsinniit annissuutiinnarnagit sapinngisamik amerlanerpaartaasa maani nunatsinni suliarineqartarnissaat anguniartariaqartoq, taamaaliornikkut aamma suliffissaqartitsineq annertunerpaaq anguneqaqqullugu.

Taamaammat partiit naalackersuisullu tamaasa matumuuna kaammattorpavut, Namminersorlutik Oqartussat aningaasartuutaasa misissoqqissaarneqarnissaat aammalu aningaasat atortakkatta sapinngisamik amerlanerpaat nunatsinni atorineqartarnissaat kaaviiartinneqarnerunissaallu sulissutigineqassasoq.

Suliakkiinermi nunatsinni, assersuutigalugu ilisimatusarfimmi ilinniartut aningaasarsiornermut inuiaqatigiilerinernullu tunngasunik ilinniagaqartut atorluarneqarsinnaasut ilanngullugu piumasaraarput, tassami paasissutissarpasuit, soorlu naatsorsueqqissaartarfimmiit, aningaasaqarnikkut ingerlatsineq pillugu nassuiaaterpasuit il.il. pigineqareerput - tamakku atorluartariaqarpavut avataaniit isumalluuteqaannarata.

Nunatta namminerisaminik aningaaseriveqalernissaa, sillimmasiisarfeqalernissaalu sulissutiginerullugulu anguniartariaqarparput, tassami aamma nunatta namminiilivinnissaa maannakkut sulissutigineqarpoq, taamaattumik aqqissuulluakkamik minnerpaamik nunatta aningaasaqarnikkut pitsaasumik inissinnissaa, ilinniartitaanikkut pimoorunnerusariaqarparput.

Taamaattumik naalackersuisooqatigiinnissamik isumaqatigiissutitsinni anguniakkatta ilaasa maanna piviusunngortinniarnearneri, ilaatigut aamma meeqqanut inuusuttunullu suliniutit assigiinngitsut aningaasaliiffigineqarnissaat, ineqarnermut tapiissutit iluarsivigineqarnissaat, ilinniartitaanikkut pitsanngorsaanissat, innarluutilinnut siusinaartumillu sulisinnaajunnaarnersiutilinnut aaqqiissutissat il.il. suliarineqarmata tamakkiisumik taperserlugillu peqataaffigissuagut.

Meerartatta pitsaasumik perorsarneqarnissaat angajoqqaat akisussaaffiginerpaajuaat, kisianni aamma meerarpasuit ilaat meeqquerivinni meeraaqquerivinnilu ullup ilarujussua paarineqartarput, taamaattumik taakkunani pisortaasut, meeqqanut piffissaqarnerunissaat pisariaqarluinnartoq isumaqarpugut, tassami pisortat ulluinnarni sulinerminni meeqqanut tunngasunik sullissinissaraluartik allaffissornerujussuarmut atortarpaat, taamaattumik meeqqanut atualinngitsunut perorsaanikkut inerikkiartuutaasumik ulluunerani neqeroorutit tamakkiisumik

naammaginatumillu atuutsinneqassappata isumaqarpugut meeqquerivinni pisortat allaffissornikkut ikiorserneqartariaqartut.

Meeqqat inuusuttuaqqallu angerlarsimaffiup avataanut inissinneqartartorpassuit nakkutigineqarnerullutillu pisortaniit malinnaaffigineqarnerunissaat piumasaraarput.

Upernaaq inatsisartuni oqallinnitsinni ilaatigut angajoqqaarsiaasartut ajunngittorsiassaat eqqartukkatta ilaagaat, maanilu inimi amerlanerussuteqartut kissaatingaat angajoqqaarsiat qaammammut minnerpaamik 8.000,- kr-inik ajunngittorsiassaqartinneqassasut, taamaakkaluartoq Naalackersuisut maanna siunnersuutingaat angajoqqaasiaasartut qaammammut 5.028 kr-inik pisartagaqalissasut, taammaattumik sooq inatsisartut piumasaat malillugu naalackersuisut iliuseqannginersut nassuiaqqarput.

Timimikkut tarnimikkullu innarluutillit pisinnaanerusortaasa ilai sumiiffinni assigiinngitsuni nuannarisaminnik qiimmassaatigisartakkaminnillu sulisinneqartarput.

Aamma taama periarfissiisarneq tapersorsorlugulu annertusartariaqarpoq. Tassami inuit taama atugaqartut tapersorsorlugillu kaammattortariaqarmata suli annerusumik nuannaarutissinnissaat qulakkeerniarlugu.

Inuimmi taakku ulluinnarni timikkut tarnikkullu akornuteqarneq pissutigalugu nalinginnaasumik inuttut peqqissutut pisinnaassuseqanngikkaluartut, taamaattoq inuttut naleqassutsikkut allatuulli naleqartigipput ataqqinartuullutillu.

Ajoraluartumilli inuit taakku sulisinnaasortai sulisinneqaraangamik nalunaaquttap akunneranut taamaallaat 15,- inik akissarsitinneqartarput. Akissarsiaritinneqartartoq taanna ukiorpassuarni allanngortinneqarani inissisimavoq, naak nalinginnaasumik akissarsiat akillu allat tamarmik qaffattartut, minnerunngitsumillu nioqqutissat akii aamma qaffakkaluttuinnartut.

Taamaammat partii naleqqamiit piumasaraarput, inuit qulaani taaneqartut tiiminut akissarsiarisartagaat qaffanneqarnissaat ilanngullugu aningaasanut inatsimmi inissaqartinneqassasoq.

Ukiorpassuannngulersuni naalackersuinikkut eqqartorneqartuarpoq ilisimaneqarlunilu kalaallit nunatsinniit napparsimasut danmark-imut katsorsartikkiartut, napparsimmavimmi suliaritittussanngoraangata, ilaqutaasumut/nut qaninnerpaamut/nut ajornartorsiutinik

imaannaangitsunik assigiinngitsunik nalaataqarfiusartoq aamma naak iluarsineq kingulleq atuutilereeraluartoq.

Tassami napparsimasumut pingaaruteqartorujussuuvoq nappaammik katsorsarneqarnermini erloqissutimi saniatigut allanik erloqissuteqarani toqqissisimasumik qanigisaminik ilaqarnissaq.

Ajoraluartumilli suli maannamut tusartuarparput napparsimasut danmark-imut katsorsartikkiartortut ilaasa ilaqtaminnik qanigisanik ilaqartinneqartarnerat ilaatigut napparsimasumut ilaquataasunullu naammaginangitsumik toqqissisimanangitsorujussuarmillu nalaataqarfiusartoq, tassa napparsimasoq napparsimasut angerlarsimaffiat qimallugu napparsimmavimmi suliaritittussanngoraangat, ilaquataasoq napparsimasut angerlarsimaffianniiginnarsinnaajunnaartarmat taamaattumillu allamut ilaatigut nalulluinnakkaminut nuuttariaqalertarluni.

Pissutsit taamaattut napparsimasumut ilaquataasumullu toqqissisimanangilluinnartut iluarsisariaqarput. Aamma pissutsit taamaattut katsorsartittumut iluquataangilluinnarmata.

Taamaammat piumasaraarput aningaasanut inatsisip suliarineqarneranut atatillugu aaqqiissutissanik ujartuisoqassasoq.

A/S INI-ip naatsorsuutai tamanit takuneqarsinnaasut ilaatigut takutippaat, inissiat A/S INI-mit allaffissornikkut ingerlanneqartut katillugit 9600 missaaniittut, taakkunangalu 6200 missai Namminersorlutik Oqartussanit pigineqartut.

Taamaattorli takuneqarsinnaangilaq ineqartut qassit ukiorpassuarni aalajaallutik illumi inigisamiluunniit aaliangersimasumi Namminersorlutik Oqartussat inissiaataanni illuutaanniluunniit najugaqartuunersut.

AI 2017-imi akuersissutigineqarneranut atatillugu oqaasertaliussat ilaanni Naalakkersuisut kommunut ataasiakkaanut Namminersorlutik Oqartussat inissiaataannik 1.1.2018-imiit akeqanngitsumik tunniussinissaq siunertaralugu isumaqatiginninniarnissamut isumaqatigiissuteqarnissamullu piginnaatinneqarput. Isumaqatiginninniarnerni Namminersorlutik Oqartussat inissiaattaannut pilersaarutit, 2017-imi qaammatini siullerni pingasuni piareertussat tunngavigalugit ingerlanneqarnissaat naatsorsuutigineqarpoq.

Assersuutigineqarsinnaapput utoqqaat appariit akuersinermikkut imannak paasissutissiinerat, tamarmik immikkut skat-ti peereerlugu qaammammut 6.850, - kr-inik utoqqalinersiutillit, illumut attartortittakkamut namminersorlutik oqartussanit pigineqartumut ukiuni 30-inngulersuni

najugaqarfigisimasaminnut qaammammut ineqarnermut, kiassarnermut, kallerup inneranut eqqaavinnut, telefonimullu katillugit 10.327,79 kr-inik akiliisarput.

Tupinnaqaaq paasiuminaallunilu utoqqaat ukiorpassuarni inuiqatigiinnut sullissilluareersimallutik aningaasaqarnikkut taama ajortigisumik inissisimalertarnerat.

Taamaammat tamanit takuneqarsinnaavoq, inigisamik illumilluunniit namminersorlutik oqartussanit pigineqartumik apparsaasinnaanermut periarfissaareersut utoqqaat aningaasaqarnerannut naapertuutinngilluinnartoq.

Taamaattumik utoqqaat, soorlu assersuutigalugu minnerpaamik ukiuni 25-ini inigisami illumiluunniit Namminersorlutik Oqartussat pigisaanni aaliangersimasumik najugaqarsimasut immikkut ittumik akilersuutigut oqilisaataasinnaasumik aaqiivigineqarnissaat matumuuna ujartorparput.

Aamma tamanit ilisimaneqarpoq ilaqutariit inuillu ataasiakkaat SIK-p isumaqatigiissutai naapertorlugit akissarsiallit namminerisaminnik illutaarnissaminnut periarfissaqanngitsut aamma ilisimaneqarpoq ilaqutariit aningaasarsiakinnerusut bank-i aqutigalugu aningaasanik attartornissamut amerlanertigut akuerineqarsinnaasannngitsut.

Tassami nunatsinni naatsorsueqgissaartarfiup kisitsisaatai naapertorlugit ilaqutariit 75 %-it angullugit akissarsiakinnerpaajullutik ukiumut 250.000 kr-it appasinnerusunik akissarsiaqartuusut.

Taamaattumillu namminerisaminnik initaarnissamut illutaarnissamulluunniit periarfissaqanngivissortut.

Kisianni illua-tungaaticut inuit ilaqutariillu aningaasarsiakkaat aningaasanut inatsisikkoorlugu inuiaqatigiit akileeqataaffigisaanik inissianik illumilluunniit pisisinnaanerminnut periarfissaqartinneqarput.

Aamma tamanit ilisimaneqarpoq maannamut ilaqutariippassuit inissianik attartortittakkanik akiliisinnaajunnaarneq pissutigalugu anisitaasartut amerlingaluttuinnartut.

Partii Naleqqamiit isumaqarpugut ilaqutariit inuillu toqqissisimanissaat anguniarlugu, inuit ilaqutariillu pissakinnerusut nammineerlutik illutaarsinnaanernut periarfissanik pitsaanerusunik periarfissiisariaqartugut.

Taamaammallu Boligstøtte aqutigalugu annikitsunik ernialerlugit illutaarsinnaaneq aqutigalugu periarfissiisoqaqqittalernissaa partiinut ataatsimiititaliamullu eqqarsaatigeqqarput.

Imaluunniit nunaqarfinni isorliunerusunilu namminerisamik illutaarsinnaanermut periarfissanut assigusumik aaqqissuussisoqartariaqartoq partii naleqqamiit isumaqarpugut. Aamma isumaqarpugut ullumikkut nunaqarfinni isorliunerusunilu akiliuteqarnissamut periarfissat qaffasippallaalersimasut apparsarneqarsinnaanerit nalilersorluarneqartariaqartoq.

Tassami kikkulluunniit toqqissisimanartumik najugaqarnissamut periarfissaqartariaqarput, minnerunngitsumik illumik inissiamilluunniit inuit ilaqutariillu akissarsiakkitsut artorsinngikkaluarlugit atorneqarsinnaasunik.

Namminersorlutik Oqartussat inissiaataannik isumaginninneq nakkutilliinerlu, minnerunngitsumillu suliassaqaarfiup ilaata Nuummi namminersortumut sanaartormik ingerlataqartumut suliakkiissutigineqarsimaneranut atatillugu partii naleqqamiit paaserusupparput, suliat sumut killinnersut aamma illoqarfinni inissianik isaterineq iluarsartuussinerillu ilanngullugit pilersaarutit sumut killinnersut, soorlu AIS 2016-ip kalaallisoortaani qupperneq 122-imi allaaserineqartut.

Aamma paasiuminaatsipparput Namminersorlutik Oqartussat inissiaataannik allaffissornikkut aqutsineq, tassa inissiat ilaat pisariaqartisinerlut naapertuutinngitsumik attartortinninneqartut oqaatigineqartarmat, tassagoq inissiat ilai ineqartut pisariaqartitaannut angivallaarujussuanngikkunik mikivallaartarmata. Angivallaartullu soorunami attartortumut aningaasaqarnikkut ajornartorsiortitsisinnaammata.

Pinngortitap avatangiisillu mingutsinneqannginnissat soqutigisatta pingaartut ilagilluinnarpaat, taamaattumik Nukissiuutit ataavartut mingutsitsinngitsullu atorluarneqarnerunissat oliamillu atuinerup sapinngisamik minnerpaafissaaniitinnissaanik anguniagaqarneq pimoorunnerullugu sulissutigisariaqaripput isumaqarpugut.

Pingaartumik kinguaatta nuannersunik minguitsunillu avatangiiseqarnissat, nerisaqarnikkullu peqqinnartunik inuussutissaqarnissat qulakkeerniarlugi pinngortitamut avatangiisinullu mingutsitsinngitsunik atuinerunissarput pingaartinnerusariaqaripput isumaqarpugut.

Naluneqanngitsutut nunarujussuarput nunarsuarmi qeqertat annersaat, nunarsuarmioqatitsinniit aamma soqutigineqaraluttuinnarpoq, minnerunngitsumik pinngortitap allanngoriartornerata kingunerisaanik silap, immap, siku sersersuullu malunnaatilimmik allanngoriartornerat pissutaallutik.

Naalackersuisunut § 37-ikkut apeqquteqarninni, ilaatigut paasitinneqarpunga, nunatsinni oliemik atuilluni nukissiuuteqarnikkut kiaap pilersinneqartartup ilarujussua ukiumut 39 mio. kr-init missaani nalilik atunngitsoorlugu maangaannartinneqartartoq.

Nukissiuutinik mingutsitsinngitsunik atorluaanerunissaq minnerunngitsumillu nunatsinni aningaasanik kaaviartitsinerunissaq atorluaanerunissarlu qularutiginnilarput tamatta anguniakkatsinnut ilaatikkipput !

Taamaattumik nukissiuuteqarnikkut pinngortitamut avatangiisinullu mingutsitsinngitsunik atorluaanerunissarput anguniarlugu naalackersuinikkut isumatuumik iliuuseqarnissarput pimoorunnerullugu aaliangersaaffigisariaqarparput.

Nalunngilarput imaatigut inuussutissarsiuuteqarnerput ullumimut pingaarnersaajuartoq, aamma oqartarpugut aalisakkat nunatta avataanut tunisartakkavut immami minguinnerpaameersuusut, tamannami qularutiginnilarput.

Qujanartumik erngup nukinganik nukissiuuteqarnikkut siuariartornerput ilorraap tungaanut ingerlavoq.

Ullumikkut inoqarfinni erngup nukinga atorlugu innaallagissamik pilersorneqartuni, angerlarsimaffiit suliffeqarfiillu seqerngup qinngorneranik innaallagissiuutillit innaallagissamik atuineramik saniatigut innaallagissamik sinneqartoorutaat inoqarfiup innaallagissamut aqqutaanut ingerlaqqittartup, inoqarfiit erngup nukinga atorlugu innaallagissiuuteqanngitsut assigalugit, tuninissaanut periarfissaqartinneqanngillat. Periarfissaq taamaattoq suleqataaffigalugu ammaattariaqarparput.

Oliamik atuilluni nukissiuuteqarneq sapinngisamik minnerpaaffiata anguniarnerani, seqerngup kissaanik/qinngornerinik kiassaait (solfanger) taamatuttaarlu anorimik innaallagissiuutit illut qaliaani eqqaamiunut ajoqutaanngitsumik inissitat, siuarsaavigineqarnissaat ataatsimoorullugu sulissutigisariaqarparput.

Aammalu oliamik atuilluni nukissiuuteqarnikkut kissap pilersinneqartartup atorluarneqarnerulernissaa sulissutigineqartariaqartoq isumaqarpugut. Sumiiffinni oliamik atuilluni nukissiuuteqarfiusuni kissap maannamut maangaannartinneqartartup atorluarneqarnerunissaa angusinnaaqqullugu. Aamma allat misilittagaat atorluartariaqarpavut.

Imeq imermillu nukissiuuteqarneq tunisassiornerlu suli annerujussuarmik atorluartariaqaripput partii naleqqamiit isumaqarpugut. Erngup nukinganik nukissiuuterujussuarmik pilersitsisoqarsinnaaneranut ukiut arlallit matumali siorna piareersarneqarlutillu misissuiffigineqarneri annertoorujussuit

ingerlanneqareerput. Tassani maniitsup nuullu timaani suliffeqarfissuup aluminiumik aatsitsiveqalersinnaanerani pilersaaruteqaleraluarnerani nunatsinniit piareersaasioqataasimanermit nukippassuit aningaasarpassuillu atorneqarsimasut asuliinnartinneqassanngippata erngup nukinganik nukissiummik pilersitsinissaq pimoorullugu naammassiniarneqartariaqartoq isumaqarpugut.

Isumaqarpugut taamaaliornikkut nunatsinni suliffissaqartitsiniarnikkut minnerunngitsumillu piffissaq ungasinnerusoq isigalugu nunatta erngup nukinganik nunatsinniit avammut niuruteqalersinnaanera pitsaasumik periarfissinneqassasoq.

Tassami suliniutit Alcoa-mut tunngasut maannakkut uninngasutut ipput, nunatsinnilu ineriartortitseqqinnissamut aporfiulersimallutik, taamaattumik Naalakkersuisunut kaammattuutingaarput ingerlariaqqinnissamut piaartumik iliuuseqaqqullugit.

Isumaqarpugut nunatta avammut niuernermini erngup nukinganik tunisassiorneq pimoorullugu piviusunngortippagu, tamanna nunatta siunissami aningaasarsiornikkut, suliffissaqartitsinikkut allarpassuartigullu iluaqutigilluarsinnaagaa, tassami maannakkut avammut niuernitsinni niuerutissanik iluanaarutigisinnaasatsinnik amigaateqarpugut.

Suliamut tunngatillugu misissuinerparujussuit ingerlanneqareernikuupput taamaammat misissueqperujussuarnissaq annerusumik pisariaqarsorinangilaq, taamaallaalli nukissiuuteqalernissamut aningaasalersuinissamut periarfissat aamma avammut niuruteqarnissamut periarfissat aqqutissallu suliarinissat pisariaqassallutik.

Erngup nukinganik atorluaaneq avammullu niuruteqarneq eqqarsaatersuuteqarfigissagaanni aamma ilanngullugu eqqarsaatigineqartariaqarpoq nunatta kangiani erngup nukinganik atorluaanissamut periarfissat. Tassanngaanniit islandikkoorlugu europamut niuruteqarsinnaanerup periarfissai kitaaniit amerika avannarlernut niuruteqarsinnaanermit periarfissaasunut assigusutut isikkoqarmata. Nalunaarusiaq taamaammat nuna tamakkerlugu erngup nukinganik pilersuinermit piukkunnaatilinnik, periarfissanik aammalu erngup nukinganik nunatsinni atorluaanissamut unammilligassanik ersersitsuussaaq, aamma avammut niuruteqarnissaq eqqarsaatigalugu.

Angallannermit tunngatillugu mittarfiliortiternissamut pilersaarutit tunngaviatigut taperserpavut, kisianni aningaasalersorneqarnissaannut tunngatillugu assut eqqarsarnartoqartitsivugut, tassa aningaasalersuinissamik pilersaarummik suli tamakkiisumik takussutissiisoqanngimmat.

Aamma paasiuminaatsipparput ilaasunik angallassineq kiffartuussinerlu pillugit isumaqatigiissummut atatillugu 8 mio kr-inik aningaasaleeqqittoqarnissaa siunniunneqarsimammat, naak kiffartuussinissamik isumaqatigiissut naamagineqanneqisoq pillugu misissuititsineq suli naammassineqanngikkaluartoq. Tassami isumaqatigiissut sularineqarmallit inuiaqatigiit neriorsorneqareernikuupput ajornerulersitsisoqassanngitsaq.

Aamma isumaqarpugut umiarsualeveqarfik SIKUKI Harbour aamma RAL Selskabe-mut ataatsimut kattutsinneqartariaqartut. Tassami suliassaqarfik ataaseq innuttaasut taama ikitsigisut selskab-inik marlunnik kiffartuunneqarnissaat pissusissamisuunngimmat.

Isumaqarpugut aningaasaleeqqinnissamik siunnersuutigineqartut, ittoqqortoormiiniit, ittoqqortoormiinut, qeqertarsuatsiaaniit, qeqertarsuatsiaanut, kangaatsiamiit kangaatsiamut, qeqertarsuariit qeqertarsuarmut, qasigiannguaniit qasigiannguanullu angallannikkut pitsanngorsaatissanut atorineqartariaqartut.

Tassa ittoqqortoormiiniit ittoqqortoormiinullu angallanneq ajorluinnarmat, inuimmi taakku nunatta oqaluttuarisaaneranut nunattalu tamakkiisumik pigiinnarneranut sunniuteqarnerpaajummata, angalassangunillu nunamut allamukaqqaartarnerat akuerineqarsinnaanngimmat.

Qeqertarsuatsiaaniit qeqertarsuatsiaanullu ukiuunerani helikopter-imik tikinneqartalernissaat piumasaaqatingaarput, piffissami tassani imaatigut angalaniarneq ajornartorsiutinik arlalinnik nassataqarsinnaasarmat.

Kangaatsiamiik kangaatsiamullu sinersortaap tikitalernissaa pisariaqarpoq, tassami sinersortaap Kangaatsiap avateralaannguatigut aqqusaartuaannarmat.

Qeqertarsuaq aamma Qasigiannguut sinersortaammik tikinneqartalernissaat aamma piumasaaqatingaarput, taakkunani aamma angallannikkut ajornartorsiuteqarneq imaannaaneq ajormat.

Taama oqareerluta suli amigaatigivagut utoqqalinersiutinut iluarsisutissat, tassami Naalakkersuisut neriorsuutigereernikuuaat, utoqqaat aappaasup isertitai apeqqutaatinnagit utoqqalinersiuteqartinneqalissasut.

Aamma suli amigaatigivagut upperisarsiornerup iluani iluarsisassat, pingaartumik oqaluffinni pattattoqarnikkut amigaataasut, tassami takorlooruminaattorujussuugaluarpoq, illoqarferujussuarni,

soorlu nuummi, ilulissani, qularnanngitsumillu aamma allani pattattussaqaarani naalagiarnerit akulikillingaluttuinnarmata.

Aalisarnej tamanit ilisimaneqartutut inuussutissarsiutit suli pingaarnersaraat aamma naluneqanngilaq aalisarnermut inatsit maannamut ukiorpaalunngulersuni iluarsaanniarnearalarpoq.

Neriussimagaluarput ukiaq manna ataatsimiinnermi aalisarnermut inatsisip tamakkiisumik naammassillugu suliarineqarneqarnissaa piumaartoq. Kisianni uggornaraluartumik paasivarput, suliaq ukiaq manna siullermiiginnarlugu oqaluuserineqassasoq, soorunami pakatsivugut aamma aalisartorpassuit utaqqikatalermata.

Nalunngilarput sinerissap ilarujussuani aalisagaqarluartoq tamakkiisumik atorneqanngitsunik, pingaartumik aamma sumiiffinni nunaqarfinnut qanittumiittuni. Taamaattumik aningaasarsiornej suli pitsanngoriaateqassappat, aamma taamaattariaqarpoq – nunaqarfiit ilaanni tunitsiveqarnikkut umiarsualiveqarnikkullu piorsaaneq aallunneqartariaqarpoq.

Aalisartorsuit inuiaqatigiinnut aningaasaqarnikkut sunniuteqarluarlutik napatitseqataasimasut ilarpassui ullormiit ullormut susinnaajunnaarsinneqarsimanerisa misissuiffigineqarsinnaanerata partii naleqqamiit annerusumik misissuiffigineqarsinnaanerata partiinut tamanut isumaliutigeqqarput.

Aningaasaqarnermut siunnersuisooqatigiit arlalitsigut tikkuartuippat isornartorsiuillutillu aamma tamanna ajunngilaq, kisianni sooruna assersuutigalugu: inuussutissarsiutit pingaarnersaannut tunngatillugu, aalisakkat avammut niuerutigineqarnerannut atatillugu aalisakkat naleqarnerulersinneqarsinnaanerannut tunngasunik siunnersuerusunnigitsut ? Qanoq iliornikkut aningaasanik nunatsinniit aniatitsineq killilersimaarneqarsinnaanersoq ? Tassami aamma naalackersuinikkut ukiorpassuannngulersuni kissaatiguarparput, aalisakkat avammut niuerutigineqarneranni naleqarnerulersitsinissaq.

Aamma nunatta namminerisaminik aningaaseriveqalersinnaanera sillimassiisarfimmillu pilersitsisinnaanerata nunatsinnut aningaasaqarnikkut qanoq sunniuteqarsinnaanerata aningaasaqarnermut siunnersuisooqatigiinnit misissuiffigineqarnissaa eqqarsaatigineqartariaqartoq Naalackersuisunut kaammattuutigaarput.

Tassa Aningaasaqarnermut Siunnersuisooqatigiit nutaaliornerusumik nunatsinnullu aningaasaqarnikkut pitsaanerusumik sunniuteqarnerusumik siunnersuisarnissaat Naalackersuisuniit piomasaaqatigineqassasoq kaammattuutingaarput.

Taama oqaaseqarluta suliap aappassanneerreqannginnerani Aningaasaqarnermut
Akileraartarnermullu ataatsimiititaliami sukumiisumik suliarineqarnissaa inassutingaarput.